

四庫全書

史部

欽定四庫全書

欽定續通志卷六百三十八

四夷傳

四

占城

真臘

投和 婆利 赤土 丹丹  
羅刹 婆羅 殊禁 甘

崇 僧高

武令

迦乍

揭密

盤盤

哥羅

拘婁密

扶南

曉博

婆岸

千支

跋若

摩臘

哥羅舍分

修羅分

三佛齊

甘單

多摩菴

闍婆

蒲甘 迦黎

勃泥

注輦

丹眉流

安南

林觀符 郡落

暹

爪哇

馬八兜

俱藍

占城在中國西南即周時越裳地秦為林邑漢為象林  
縣後漢至隋復稱林邑唐時稱占不勞或稱占婆其王  
所居曰占城至德後改其國號曰環周以後仍稱占城  
東至海西至雲南南至真臘國北至驪州界統大小州  
三十八有縣鎮無城郭人口希少人多乘象或於交州  
市馬風俗衣服與大食相類其王或以兄為副王或以  
弟為次王設高官八員東西南北各二勝兵萬餘人唐

武德中再遣使獻方物

此下採自唐書環王傳考傳云所居曰占城而其國自五代以後俱

稱占城故刪附於此

貞觀時其王范頭黎遣使貢獻頭黎死子鎮龍

立亦入獻十九年其下摩訶慢多伽獨弒鎮龍滅其宗范  
姓絕立頭黎塔婆羅門為王大臣共廢之更立頭黎女不  
能定其下乃迎頭黎之姑子諸葛地為王妻之永徽至天  
寶凡三入獻元和初不朝獻安南都護張舟執其都統虜  
王子五十九人周顯德中其王釋利因德漫始遣使貢方  
物宗建隆二年王釋利因陀盤遣使者入朝以後屢遣使

來貢政和中始授其王楊卜麻疊金紫光祿大夫領康白  
州刺史宣和元年進檢校司空兼御史大夫懷遠軍節度  
琳州管内觀察處置使封占城國王自是每遇恩輒降制  
加封邑建炎三年遣使入貢遇郊恩授檢校太傅加食邑  
紹興二十五年其子鄒時闡已嗣立遣使貢求封爵以其父  
初封之爵授之乾道三年子鄒亞娜嗣掠大食國方物遣使  
貢以求封爵為其國人所訴詔卻之遂不議封七年閩人有  
浮海之吉陽軍者風泊抵占城其國方與真臘戰皆乘象勝負

不能決閩人教以騎射與戰大捷淳熙四年又以舟師襲真臘傳其國都真臘大舉伐占城俘其主以歸元世祖至元十五年以宋平遣人至其國還言其王失里咱牙信合八刺哈迭瓦有內附意詔授榮祿大夫封占城郡王十七年又遣使貢十九年以占城國主稱臣內屬即其地立省撫安之既而其子補的專國負固弗服命占城行省官自廣州航海伐之遷延至二十一年卒不能定再命往征不果行其國亦不復朝貢

真臘國亦名占臘在占城之南東際海西接蒲甘南抵  
加羅希風俗同占城唐自武德至聖歷凡四來朝以後  
亦頗有貢獻宋政和六年遣使貢宣和二年又來封其  
王與占城等建炎二年以郊恩授其王金裒賓深檢校  
司徒加食邑遂定為制其南又有投和自廣州西南海  
行百日乃至王姓投和羅名脯邪迄遙貞觀中嘗遣使  
表獻方物婆利者直占城東南自交州汎海歷赤土丹  
丹諸國乃至地大多馬亦號馬禮表長數千里其東即

羅刹與婆利同俗隋煬帝遣常駿使赤土遂通中國赤  
土西南入海得婆羅總章二年其王旃達鉢遣使者與  
環王使者偕朝占城南有殊禁者汎交趾海三月乃至  
與婆羅同俗貞觀二年使者上方物九年甘棠使者入  
朝國居海南十二年僧高武令迦乍鳩密四國使者朝  
貢僧高直水真臘西北與占城同俗其後鳩密王尸利  
鳩摩又與富那王尸利提婆跋摩等遣使來貢永徽以  
後僧高等國悉為真臘所并盤盤在南海曲北距占城



限少海與狼牙修接自交州海行四十日乃至貞觀中  
再遣使朝其東南有哥羅統州二十四又東南有拘婁  
密海行一月至南距婆利東距不迷西北距文單俗與  
赤土隨和羅同永徽中入獻扶南在日南之南七千里  
地卑窪與占城同俗有城郭宮室治特牧城為真臘所  
逼南徒那弗那城武德貞觀時再入朝又獻白頭二人  
白頭者直扶南西人皆素首膚理加脂居山穴四面峭  
絕人莫得至又有膽博或曰膽婆北距統伽河多野象

顯慶中與婆岸千支跋若摩臘四國並遣使入朝千支  
在西南海中本南天竺屬國亦曰半支跋若北距多摩  
耆又有哥羅舍分修羅分甘畢三國貢方物甘畢在南  
海上東距占城哥羅舍分在南海南修羅分在海北東  
距真臘風俗略相類又有多摩耆東距婆鳳西多隆南  
千支北訶陵其國經薩盧都訶盧君那盧占城諸國乃  
得至交州顯慶中貢方物

三佛齊古名干陀利國與占城為鄰居真臘閩婆之間

管十五州四時多熱少寒其地無麥有米文字用梵書  
以王指環為印亦有中國文字上章表用之累覺為城  
周數十里周椰葉覆屋人民散居不輸租賦有征伐則  
隨時調發稱王曰詹卑國人多蒲姓宋建隆以後其王  
屢遣使來貢咸平六年遣使奏本國建佛寺以祝聖壽  
願賜名及鐘詔寺為承天萬壽鑄鐘以賜加其使為將  
軍大中祥符元年又來貢詔其使赴泰山陪位朝覲壇  
天禧元年天聖六年遣使貢後貢使數至南渡後紹興

淳熙兩來貢凡貢者皆館於泉州以後頻有貢獻元絕不通

閩婆國在南海中唐曰訶陵又曰社婆社與閩土音同故亦名閩婆地平坦宜種植煮海為鹽其他物產制度略與占城同唐貞觀中與墜和羅墜婆登皆遣使者入貢至上元間國人推女子為王號悉莫威令整肅道不舉遺大厯中使者嘗三至元和八年來獻太和再朝貢咸通中遣使獻女樂宋淳化三年王遣使貢云中國有

真主乃修朝貢其後不至又蒲甘國崇寧五年遣使入貢  
邈黎國元祐四年來上表有司請視于闐條式待之

渤泥國在西南大海中其國以版為城統十四州在王  
左右者為大人戰甲以銅鑄其地無麥有麻稻無蠶用  
吉貝織成布以十二月七日為歲節宋太平興國二年其  
王始遣使貢詔館其使禮賓院優賜遣之元豐五年復遣  
使貢其使乞從泉州乘海舶歸國從之元絕不通

注輦國水行至廣州一萬一千四百里其國有城七重

每城相去百步四城用磚二用土最中以木即國主所  
居所統三十一部落有四侍郎分理之刑禁略與上城  
同俗衣布兵陣象居前宋大中祥符八年遣使來貢宴  
賜恩例同龜茲使明年使回賜予甚厚景祐元年以其  
使為金紫光祿大夫懷化軍熙寧十年封其其使如初  
禮又有丹眉流國

宋趙汝造指  
著作登流眉

在廣州西南俗以版

為屋四時炎熱宋咸平四年嘗遣使貢賜詔書獎諭之

安南即交趾國唐以前內隸設都護府治交州其地東

距海內接老過南渡海即占城五代時為土人曲承美所據梁末帝授以節鉞時劉隱擅命嶺表遣將李知順伐之并其地統十二州後有楊延藝紹洪皆受廣南署繼為交趾節度使紹洪卒州將吳昌岌居其位昌岌死其弟昌文襲宋乾德初昌文死州大亂先是楊延藝以牙將丁公著攝驪州刺史兼禦蕃都督公著死子部領繼之至是部領與其子璉擊平亂賊交民因推為州帥號大勝王署璉為節度使尋遜於璉聞嶺表平遂遣使

貢方物上表內附詔以璉為節度使安南都護封部領  
交趾郡王璉死弟璿幼大將黎桓遷璿別第總其衆太  
平興國五年詔諸路兵討之不克而還七年桓以丁璿  
名上表入貢自署權交州三使留後詔令其成立丁璿  
不聽命雍熙三年復遣使貢方物乃以桓為檢校太保  
使持節都督交州諸軍事安南都護充靜海軍節度交  
州管內觀察處置等使封京兆郡侯端拱元年加檢校  
太尉淳化元年加特進四年進封交趾郡王桓猶恃險



為寇害至道元年寇欽州邕州諸邊地太宗思以德綏  
之不欲問罪桓亦慙悔願守職約真宗即位進封南平  
王自是屢入貢景德三年桓卒諸子爭立詔使安撫之  
其子龍廷襲位自稱權安南靜海軍留後遣使貢詔封  
為交趾郡王賜名至忠至忠苛虐不法其大校李公蘊  
素用事陰圖之大忠祥符三年遂至忠自稱留後遣使  
貢帝以蠻俗不足貢遂用桓故事以公蘊為交趾郡王  
自是或間歲或仍歲以方物入貢天禧元年進封南平

王天聖中卒封其子德政為交趾郡王寶元元年進封  
南平王至和二年卒封其子日尊為交趾郡王神宗即  
位進南平王熙寧二年日尊奏討占城虜其王遂僭帝  
號國號大越改元寶象又改神武五年日尊卒子乾德  
立仍詔為交趾郡王元祐二年進南平王紹興二年卒  
子陽煥嗣授郡王如故事八年陽煥卒子天祚嗣授官  
如其父二十五年進南平王淳熙元年進封安南國王  
二年賜印明年天祚卒子龍翰嗣位即授安南國王嘉

定五年龍翰卒其子昊昱襲封其昱卒無子女昭聖主  
國事遂為其壻陳日熒所有李氏有國自公蘊後凡八  
傳百二十餘年而國亡淳祐二年詔以陳日熒為安南  
國王景定三年進日熒安南國大王以其子威晃為安  
南國王其後日熒為元世祖所攻破傳國於長子光昺  
改元紹隆光昺求修好納款中統元年遣使諭之二年封  
光昺為安南國王至元十四年卒國人立其子日烜遣  
使來貢詔以日烜不請命而自立諭令入朝日烜遣其

叔遺愛來十八年詔以遺愛為安南國王未幾日烜殺之會興兵討占城遣使持書令其國助餉日烜恐見襲調兵保境官兵因攻之日烜棄城遁弟昭國王陳益稷率屬降二十三年又議大舉南伐詔諭安南吏民數日烜罪惡因封益稷為安南國王遣兵送入其境拒不納二十七年日烜卒子日燔立二十九年詔諭日燔來朝不至次年廷議征之會世祖崩遂罷成宗即位日燔遣使上表獻方物詔撫綏之延祐以後貢獻不絕日燔死

子曰曠襲位日曠卒子曰燧襲位安南所屬有生蠻林  
都符部落唐大厯中置德化州又以潘歸國部落置龍  
武州詔安南節度使綏定之貞元七年始以驩峯二州  
為都督府驩在安南限重海與文單占婆接峯統羈縻  
州十八與蜀蠻蠻接

暹國元成宗朝遣使上金字表朝廷亦遣使至其國以  
暹與麻里予兒舊相讐殺併諭解之大德中來求馬帝  
以金縷衣賜之

瓜哇在海外視占城益遠海行者先至占城而後至其國元初通使至元二十九年以其刺詔使孟右丞之面詔除史弼等平章政事會福建江昌湖廣三行省兵征瓜哇十二月自泉州後渚啓行三十年至瓜哇之杜並足水陸進軍瓜哇主塔土罕必闍耶舉國納降三月一日會軍八節澗會葛郎王來侵瓜哇土罕必闍耶求援分兵屢敗其衆遂伐葛郎受其王哈只葛當之降土罕必闍耶旋叛去留軍拒戰傷萬戶魯智密鼎等數人師還得哈只

葛當妻子宫屬百餘人及地圖戶籍所上金字表以進  
馬八兒與俱藍國為海外諸蕃國綱領元世祖至元間  
行中都省索多奉璽書招諭馬八兒奉表稱藩十六年  
復遣廣東招討使達魯噶齊楊廷璧往招俱藍得其降  
表十九年三月俱藍遣使入貢是時因庭璧招諭遣使  
來貢者凡十國云

欽定續通志卷六百三十八

欽定四庫全書

欽定續通志卷六百三十九

四夷傳

五

兩爨蠻

徒莫祇蠻等

黎州十二蠻

昆明蠻

牂柯蠻等

東謝蠻

南謝蠻等

西南諸夷

瀘州徼外蠻

黔涪徼外蠻

松外蠻

西洱河蠻等

雅州蠻

嵩州六姓蠻

叙州三路蠻

威州蠻

茂州諸部落

南平獠

永昌蠻



兩爨蠻自曲州靖州西南昆川曲輓晉寧喻獻安寧距  
龍和城通謂之西爨皆白蠻自彌鹿升麻二川南至步  
頭則謂之東爨皆烏蠻西爨自云本安邑人七世祖晉  
南寧太守遭亂王蠻中梁元帝時南寧州刺史徐文盛  
召詣荊州有爨蠻者據其地延袤二千餘里既死子震  
翫分統其衆隋門皇初遣使朝貢命韋世沖以兵戍之  
置恭州協州昆州未幾叛史萬歲擊之至西洱河滇池  
震翫懼而入朝文帝誅之諸子沒為奴唐高祖即位以

其子宏達為昆州刺史奉父喪歸而益州刺史段綸遣  
俞大施誘諸部皆納款貢方物太宗遣將擊西蠻開青  
蛉弄棟為縣蠻蠻之西有徒莫祇蠻儉望蠻貞觀二十  
三年內屬以其地為傍望覽邱求五州隸郎州都督府  
白水蠻地與青蛉弄棟接郎州亦隸弄棟西有大勃弄  
小勃弄二川蠻與黃瓜葉榆西洱河接其衆完富無酋  
長喜相讐怨永徽初大勃弄楊承顛私署將帥寇麻州  
高宗命左領軍將軍趙孝祖等破之孝祖上言小勃弄

大勃弄常誘弄棟叛請遂西討詔可孝祖軍入斬小勃  
弄酋長歿盛執大勃弄楊承顛餘皆破降之西南夷遂  
定罷卽州都督更置戎州都督爨宏達既死以爨歸王  
為南寧州都督居石城襲殺東爨首領蓋聘及子蓋破  
徙共範川有兩爨大鬼主崇道者與弟日進日用居安  
寧城左聞章仇兼瓊開步頭路築安寧城羣蠻震騷共  
殺築城使者元宗詔蒙歸義討之歸王及崇道兄弟謝  
罪赦之俄而崇道殺日進及歸王歸王妻阿吒遣使詣

歸義求殺夫者書聞詔以其子守隅為南寧州都督歸  
義以女妻之又以一女妻崇道子輔朝然崇道守隅相  
攻討不置阿妣訴歸義為興師殺崇道及輔朝諸爨稍  
離弱閭羅鳳立召守隅并妻歸河暎不通中國阿妣自  
主其部落歲入朝日進等子孫居永昌城烏蠻種復振  
徙居西爨故地舉峯州為鄰貞元中置都督府領羈縻  
州十八烏蠻與南詔世婚姻其種分七部落曰阿芋路  
居曲州靖州故地曰阿猛曰蠻山曰暴蠻曰盧鹿蠻二

部落分保竹子嶺曰磨彌斂曰勿鄧土多牛馬無布帛  
語四譯乃通大部落有大鬼主百家則置小鬼主勿鄧  
地方千里有邛部六姓一白蠻五為烏蠻又有初裏五  
姓皆烏蠻居邛部臺登之間又有東斂蠻二姓皆白蠻  
居北谷又有栗蠻二姓雷蠻二姓夢蠻三姓散處黎窩  
戎數州之鄙皆隸勿鄧勿鄧南七十里有兩林部落有  
十低三姓阿屯三姓虧望三姓隸焉其南有豐琶部落  
阿諾三姓隸焉兩林地雖陋而諸部推為長號都大鬼

主勿鄧豐琶兩林皆謂之東蠻

按豐琶宋史作風琶兩林邛部風琶皆謂之東

蠻別載黎州十二蠻中所逐羈廉州屬與此互異今兩存之仍列黎州十二蠻于後天寶中皆受

封爵及南詔陷嵩州遂羈屬吐蕃貞元中復通款以勿

鄧大鬼主苴嵩兼邛部團練使封長川郡公死子

苴驃離幼以苴夢衝為大鬼主數為吐蕃侵獵兩林

都大鬼主苴那時遺韋臯書乞共攻吐蕃分兵大破其

青海臘城二節度軍於北谷詔封苴那時順政郡王苴

夢衝懷化郡王豐琶部落大鬼主驃傍和義郡王三王

皆入朝宴賚加等後苴夢衝附吐蕃斷南詔使路牟以兵聲其罪斬之披其族為六部以樣棄主之及苴驃離長乃命為大鬼主

黎州諸蠻凡十二種曰山後兩林蠻邛部蠻風琶蠻保塞蠻部落蠻西箐蠻淨浪蠻白蠻烏蒙蠻阿宗蠻凡風琶兩林邛部皆謂之東蠻其餘小蠻分隸焉其酋長皆號都鬼主唐時黎州領羈縻奉上等州二十六開元十七年又領羈縻夏梁卜貴等州三十一其後酋長復不通

後唐天成間始來貢宋開寶三年山後兩林蠻勿兒來  
朝三年七月又朝貢八年懷化將軍勿尼等來貢以勿  
尼為歸德將軍又以兩林蠻大鬼主蘇吠為懷化將軍  
太平興國二年遣使來貢乞頒正朔詔授勿尼歸德大  
將軍勿兒懷化大將軍是冬又遣使貢且賀登極四年  
勿兒與都鬼主又遣王子祚遇來貢八年蠻主弟年昂  
及王子年蓋副使年計等來貢詔以年昂為懷化大將  
軍年蓋等為歸德郎將年計等並為懷化司戈雍熙三



年勿尼等及其王子李奉恩復來貢淳化元年王子離  
魚副使卑都卑諭等來貢詔授離魚歸德將軍卑都保  
順卽將卑諭歸德司戈卑熟等懷化司戈天禧二年山  
後兩林百蠻都鬼主李阿善遣使貢印部州蠻亦曰大  
路蠻亦曰勿鄧居漢越嵩郡會無縣地酋長自稱百蠻  
都鬼主聞寶四年黎州定遠兵構叛聚鹿角溪都鬼主  
阿伏令弟卑吠等平之詔以阿伏為歸德將軍太平興  
國四年首領牟昂諸族鬼主副使離襪等各以方物來

貢雍熙二年都鬼主諾驅來貢詔以諾驅為懷化將軍  
端拱三年遣懷少蓋等來貢詔以少蓋為歸德郎將淳  
化元年諾驅求互市詔增其直二年復遣子牟昂叔離  
襪來貢授諾驅懷化大將軍少蓋懷化將軍牟昂歸德  
將軍離襪懷化司戈至道三年遣王子阿醉來朝真宗  
咸平二年遣王子部的來貢五年又遣王子離歸等入  
貢六年諾驅卒其子阿道立景德二年阿道遣王子將  
軍來貢詔授阿道安遠軍阿道叔懷化將軍阿育為

歸德將軍離歸為懷化將軍大中祥符元年遣將軍趙  
勿婆等來獻會于泰山天聖八年十月邛部州都蠻王  
黎在遣卑郎離滅等來貢九年三月命黎在為保義將  
軍寶元元年百蠻都王忙海遣將軍卑蓋等來貢慶厯  
四年邛部州山前山後百蠻都鬼主牟黑遣使貢未幾  
其王咩墨擾邊知黎州孫固使其首領苴尅殺之熙寧  
三年苴尅遣使來賀登極是年苴尅死以其子韋則為  
懷化校尉大渡河南邛部州都鬼主九年遣使使入貢乾

道元年詔以崖韃襲兄蒙備懷化校尉都鬼主淳熙元年吐蕃寇西邊崖韃率衆掩擊詔嘉其功二年兩林蠻王弟龍畏及酋長攻邛部州之籠竈城不克八年崖韃死其姪墨崖襲職嘉定九年邛部州逼於雲南遂服屬之風琶蠻咸平初其王曩婁遣使貢景德三年又遣使貢詔授曩婁歸德將軍保塞蠻開寶間由大渡河來歸時時來貨其善馬紹興二十七年川秦都大司言漢地民劫殺市馬蠻客崖遇等詔慰諭併償其直部落蠻亦

曰三王蠻有劉楊郝三姓世為長襲封王歲稟節度府帛三千匹以詞南詔而南詔亦密賂之覘成都虛實都押衙常倚三王部落求姑息至唐末益甚淳熙七年十月黎州五都落蠻貢馬求內附詔許通互市却其所獻乾道九年十月黎州吐蕃寇邊攻虎掌砦詔戍黎州以禦之青羌奴免結為邊害者十餘年其後置制使留正以計擒之殲其黨淳熙十二年趙汝愚代為制置使明年奴免結第三開入寇邊備完固不能攻走歸時虛恨

蠻族最强破小路蠻并其地與黎州接壤請通互市不  
許嘉定元年有彌羌蓄卜者由惡水渡河寇黎州二年  
復寇黎州八年蓄卜降唐時黎州南路又有廓清道部  
落主三人婆鹹鬼主十人又有阿逼蠻分十四部落曰  
大龍池曰小龍池曰控曰苴質曰烏披曰苴賃曰威策  
水曰戎列曰婆狄曰石地曰羅公曰詵曰離旻曰里漢  
黎邛二州東又有凌蠻唐後無聞

蠻西有昆明蠻一日昆彌以西洱河為境土畝濕宜

杭稻俗與突厥同唐武德中朝貢求內屬歲與牂柯使  
偕來龍朔三年比樓等七千戶內附總章三年置祿州  
湯望州咸亨三年昆明十四姓內附析其地為殷州總  
州敦州以安輯之其後又置盤麻等四十一州皆以首  
領為刺史昆明東九百里為牂阿國地數千里元和八  
年上表請盡歸牂柯故地開成元年鬼主柯珉內屬會  
昌中封其別帥為羅殿王世襲爵其後又封別帥為滇  
王皆牂柯蠻東距辰州二千四百里南至交州千五百

里無城郭土熱多霧雨稻粟再熟俗與東謝同首領亦  
姓謝氏武德三年龍羽遣使者朝以其地為牂州拜龍  
羽刺史封夜郎郡公其北百五十里有別部曰兗州蠻  
亦來朝貢以地為兗州開元中牂柯酋長元齊死孫嘉  
藝襲官封其後乃以趙氏為酋長二十五年趙君道來  
朝其裔有趙國珍天寶中有戰功授黔中都督屢敗南  
詔護五溪十餘年終工部尚書貞元中官其酋長至十  
八年五遣使朝元和初數遣使來或朝正訖開成不絕



西爨之南有東謝蠻居黔州西三百里南距守宮獠西連夷子地方千里宜五穀為畬田歲一易之衆處山巢居汲流以飲有謝氏世為酋長部落尊畏之唐貞觀三年其酋元深入朝以地為應州即拜元深刺史隸黔州都督府又有南謝酋領謝彊亦來朝以其地為莊州授彊刺史建中三年大酋長檢校蠻州長史資陽郡公宋鼎與諸謝朝賀德宗以其國小不許黔中觀察使王礎奏請許三年一朝詔從之元和中辰叔蠻酋張伯靖叛

侵播費二州詔荆南節度使嚴綬壓以大兵招之伯靖  
率家屬詣江陵降授右威衛翊府中郎將東謝南有西  
趙蠻東距夷子西屬昆明南西洱河山穴阻深莫知道  
里戶萬餘俗與東謝同趙氏世為酋長夷子渠帥姓季  
氏與西趙皆南蠻別種貞觀中皆遣使入朝西趙酋領  
趙首摩內附以其地為明州授酋摩刺史

西南諸夷漢牂柯郡地唐末王建據西州遂不通後唐  
天威二年牂柯清州刺史宋朝化等來朝其後孟知祥

據西川復不朝貢宋乾德三年平孟昶五年知西南夷  
南寧州蕃落使龍彥瑤等來貢詔授彥瑤歸德將軍南  
寧州刺史蕃落使又以順化王武才為懷化將軍武才  
弟若啟為歸德司階武龍州東山羅波源訓州雞平戰  
洞羅母殊石人諸部落三子並為歸德司戈開寶二年  
武才等又來貢以武才為歸德將軍四年龍彥瑤卒以  
其子漢塘襲使八年三十九部順化王子若發等來貢  
太平興國五年夷王龍瓊居遣其子羅若從并諸州蠻

貢方物六年保州刺史董奇死以其子紹重繼之雍熙  
二年奉化王子以憇等貢方物夷王龍漢璿遣牂柯諸  
川酋長來獻方物授漢璿歸德將軍南寧州刺史淳化  
元年漢璿遣弟漢興來朝三年夷王龍漢興及都統龍  
漢璿刺史龍光顯龍光盈及順化王雨滯等各來貢至  
道元年龍漢璿使龍光進率西南牂柯諸蠻來貢詔  
授漢璿寧遠大將軍封歸化王又以羅以植為安遠大  
將軍龍光盈龍光顯並為安化大將軍光進等二十四

人並授將軍郎將司階司戈咸平元年龍漢璵遣使龍  
光腴又率牂柯諸蠻來貢三年都部署張文默來貢五  
年漢璵又遣牙校率部蠻來貢景德四年西南蠻羅甕  
井都指揮使顏士龍等來貢大中祥符元年江安縣夷  
人為亂詔遣閤門祇候侍其旭招撫旭至蠻人首罪殺  
牲為誓未幾復叛二年詔文思副使孫正辭等為都巡  
檢使入其境示以兵威皆震伏正辭言夷人安集赦其  
罪五年晏州多剛縣夷人斗望行牌率衆劫掠六年九

月詔王懷信為嘉眉戎瀘等州水陸都巡檢使閤門祇  
候康訓符承訓為都同巡檢使與轉運使寇瑊合擊破  
之七年正月其酋斗望三路分衆來鬪又敗乃詣軍首  
服詔撫諭之天聖四年至皇祐二年龍氏凡四來貢獻  
是年以龍光辨為寧遠軍大將軍大光凝龍異豈並為  
安遠大將軍龍溪魯為武寧大將軍至和中龍以烈龍  
異靜首領等皆入貢命其首領下九十三人為大將軍  
及郎將有差嘉祐中以烈復至又有張玉石自品者喜

祐中來貢而鷓州亦遣人來貢命保州董仲元為本州  
刺史鷓州保州皆西南邊也

瀘州西南徼外古羌夷之地所部十州曰鞏曰定曰高  
曰奉曰清曰宋曰納曰晏曰投附曰長寧皆依山為險  
善寇掠朝廷置吏領其地之清井監以拊御之宋慶厯  
四年四月夷人攻三江砦詔選官捕擊既降復入寇三  
江砦指使王用等擊走之皇祐元年二月夷衆復圍清  
井監詔知益州田況發旁郡士卒命梓夔路兵馬鈐轄

宋定往援數月乃平嘉祐二年三里村夷斗還等復謀  
內寇有黃土坎夷斗蓋來告涓井監捕斬之明年補斗  
蓋長寧州刺史瀘州部有涓水夷者羈縻州五圉蠻也  
實姚州故地慶厯初烏蠻王子得蓋居其地請名州以  
長其部落乃復建姚州以得蓋為刺史得蓋死其子竊  
號羅氏鬼主鬼主死子僕夜襲其號浸弱不能令諸族  
烏蠻有二酋領曰晏子曰斧望箇怒皆侯夜諸部也浸  
彊擅劫晏州山外六姓及納溪二十四姓生夷熙寧七



年六姓夷自消井謀入寇命熊本經制之山前後長寧等部及武都夷皆內附於是晏子斧望箇恕及僕夜皆願入貢受王命晏子未及命死以箇恕知歸來州僕夜知姚州箇恕子乞弟晏子子沙取祿路並為把截將西南夷部巡檢十年羅苟夷犯納溪砦詔涇原副總管韓存寶擊之存寶召乞弟等犄角討蕩五十六村十三囤蠻乞降願納土承賦租元豐元年乞弟率晏州夷至江安城下責平羅苟之賞以乞弟襲歸來州刺史蠻以為

畏已益悖慢遂以衆圍羅箇年族梓夔都監王宣往救  
之一軍皆沒四年詔以環慶副總管林廣代存寶討賊  
乞弟引衆遁五年正月次歸來州以其地物羅氏鬼主  
乞弟尋死於是羅始党斗然斗更等諸酋請依十九姓  
團結新取生界八姓兩江夷族請依七姓團結皆為義  
軍從之其後瀘夷不復為患沙取祿路死子鼈獒襲政  
和五年晏州夷卜漏叛砦將高公老遁招討使趙適討  
平之授鼈獒西南夷界都大巡檢

黔州涪州徼外其西南部蠻有龍蕃方蕃張蕃石蕃羅蕃者號五姓蕃宋初常奉職貢受爵命治平四年十二月知靜蠻軍蕃落使龍異閭等入見詔以異閭為武寧將軍熙寧元年有方異玃三年有張漢興各以方物來獻授異玃靜蠻軍漢興捍蠻軍並節度使六年龍蕃羅蕃方蕃石蕃等朝貢其後比歲來元豐七年西南程蕃乞貢方物依五姓例從之元祐二年西南石蕃石以定等齋表入貢五年八年紹聖四年龍蕃皆貢方物龍于

諸姓最大其貢奉尤數元符二年又有年韋蕃入貢諸蕃部族數十獨五姓最著程氏韋氏皆比附五姓故號西南七蕃云

松外蠻諸部大者五六百戶小者二三百凡數十姓趙楊李董為貴俗皆擅山川不能相君長有城郭文字頗知陰陽歷數自夜郎滇池以西皆莊蹻之裔以十二月為歲首唐貞觀中太宗以右武侯將軍梁建方發蜀十二州兵進討諭降者七十餘部署首領蒙和為縣令餘

衆感悅西洱河蠻亦曰河蠻道繇郎州走三千里亦遣  
首領納款軍門二十二年西洱河大首領楊同外東洱  
河西首領楊斂松外首領蒙羽皆入朝授官秩顯慶元  
年西洱河蠻及顯和蠻酋卽昆梨盤四州大首領並入  
朝貢方物其後茂州西南築安戎城絕吐蕃通蠻之道  
生羌爲吐蕃鄉導攻拔之增兵以守西洱河諸蠻皆臣  
吐蕃開元中首領始入朝授刺史會南詔蒙歸義拔大  
和城乃北徙更羈制於浪穹詔浪穹詔已破又徙雲南

柘城

雅州西山野川路蠻者亦西南夷別種有通吐蕃道三  
曰夏陽曰夔松曰始陽皆諸蠻錯居凡部落四十六距  
州三百餘里之外有百坡當品巖城中川鉗矣昌逼鉗  
井七部落四百餘里之外有羅巖當馬三井束鋒名耶  
鉗恭畫重羅林籠羊林波林燒龍逢索古敢川驚川禍  
眉不燭十七部落五百餘里之外有諾祚三恭布嵐欠  
馬論川讓川遠南卑盧夔龍曜川金川東嘉梁西嘉梁

十三部落六百餘里之外有椎梅作重禍林金林邏蓬  
五部落唐以來皆羈縻州也以首領襲刺史宋太平興  
國三年首領馬令膜等來貢悉授官遣之紹聖二年以  
碭門若蠻畿王元壽襲懷化司戈

嵩州新安城傍有六姓蠻曰蒙蠻夷蠻訛蠻狼蠻勿鄧  
白蠻戎州管內有馴騁浪三州大鬼主董嘉慶累世內  
附以忠謹稱封歸義郡王唐貞元中狼蠻亦請內附補  
首領狼沙為刺史西川節度使韋皋檄嘉慶兼押狼蠻

又有魯望等部落徙居戎州馬鞍山其北又有浪稽蠻  
羅哥谷蠻東有婆狄蠻烏皮蠻南有離東蠻鍋銼蠻西  
有磨些蠻與南詔越析相姻婭自浪稽以下古滇王哀  
牢雜種其地與吐蕃接亦有姐羌古白馬氏之裔劍山  
當吐蕃大路屬石門柳彊二鎮置戍守捉以招討使領  
五部落曰彌羌曰鑠羌曰胡叢其餘東欽磨些也又有  
夷望鼓路西望安樂湯谷佛蠻虧野阿醯阿鵝鉚蠻林  
井阿兵十二鬼主皆隸舊州又有奉國苴伽十一部落



春秋受賞於雋州然挾吐蕃為輕重又有顯養東魯諸  
蠻永徽三年與胡叢皆叛高宗以右驍衛將軍曹綱叔  
為雋州道行軍總管攻拔之

叙州三路蠻西北曰董蠻正西曰石門部東南曰南廣  
蠻董蠻酋董氏宋初有董春惜者貢馬自稱馬湖路三  
十七部落都王子其地北近犍為之沐川賴因砦砦阨  
蠻險熙寧紹聖中蠻數寇抄嘗徙賴因監押駐榮丁砦  
而以縣吏控截政和五年始改差監押充知砦事蠻寇

如故南廣蠻大觀三年以地內屬詔建滋純祥三州後  
皆廢石門部與臨洮王羌接馬湖南廣皆畏之蓋即浪  
稽魯望諸部也

威州蠻霸蠻者唐保霸二州也天寶中所置後陷沒酋  
董氏世有其地保州有董仲元霸州有董永錫者宋嘉  
祐及熙寧中皆嘗謝命於朝政和三年開招置官吏以  
董舜咨保州地為祺州董彥博霸州地為亨州授舜咨  
刺史彥博團練使舜資尋遷觀察使彥博留後遂為節

度使後改為砦

茂州諸部落蓋塗靜當直時飛宕恭等九州蠻也蠻推一人為州將而常詣茂州受約束茂州宋初無城隍蠻乘夜入寇熙寧八年築城蠻以為侵其地率衆奄至知州事范百常擊走之政和五年直州將王永壽湯延俊董承有等各以地內屬詔以永壽地建壽寧軍延俊承有地置延寧軍未幾皆廢七年塗靜時飛等州蠻復反茂州詔以孫義叟節制綿茂軍及中軍將种友直等破

之其酋旺烈等降宣和五年宕恭直諸部落入寇六年  
塗靜蠻復犯茂州

南平獠東距智州南屬渝州西接南州北涪州多瘴癘  
山有毒草沙虱蝮蛇其王姓朱氏號劒荔王唐貞觀三  
年遣使內款以其地隸渝川有甯氏世為南平渠師武  
德初甯長真以寧越鬱林之地降高祖授長真欽州都  
督其族人合浦太守甯宣亦遣使來降未報而卒以其  
子純為廉州刺史族人道明為南越州刺史六年長真

來貢獻昆州刺史沈遜融州刺史歐陽世普象州刺史  
秦元覽亦來獻高祖以道遠勞人皆不受道明與高州  
首領馮暄談殿據南越州反攻姜州甯純以兵援之八  
年長真臨封山縣昌州刺史龐孝恭持擊暄等走之明  
年道明為州人所殺未幾長真死子據襲刺史馮暄談  
殿阻兵相掠太宗遣散騎常侍韋叔諧等持節宣諭暄  
等與溪洞首領皆降南方遂定巴州山獠王多馨叛梁  
州都督龐玉梟其首又破餘黨符陽白石二縣獠其後

眉州獠反益州行臺郭行方大破之未幾又破洪雅二  
州獠是歲益州獠亦反貞觀七年東西王銅獠反以右  
屯衛大將軍張士貴為龔州道行軍總管平之十二年  
巫州獠叛夔州都督齊善行擊破之鈞州獠叛桂州都  
督張寶德討平之明州山獠又叛交州都督李道年擊  
走之是歲巴洋集壁四州山獠叛攻巴州遣右武侯將  
軍上官懷仁破之十四年羅寶諸獠叛以廣州都督党  
仁弘為賓州道行軍總管擊之太宗再伐高麗雅邛眉

三州獠相率叛詔發隴右峽兵二萬以茂州都督張士貴為雅州道行軍總管與右衛將軍梁建方平之高宗初琰州獠叛梓州都督謝萬歲等討之萬歲與謝法興入洞招慰遇害顯慶三年羅賓生獠酋領多胡奈率衆內附上元末納州獠叛寇故茂都掌二縣詔黔州都督發兵擊之大厯二年桂州山獠叛貞元中嘉州綏山縣婆籠川生獠首領甫枳兄弟誘生蠻為亂西州節度使韋臯斬之招其首領勇于等出降獠自是不擾境戎瀘

間有葛獠大中末叛立酋長始艾為王刺史劉成師誘降其黨斬首領七十餘人餘衆遁至東川節度使柳仲郢諭降之宋治平中熟夷李光吉梁秀等三族據渝州南平舊地數以其徒偽為生獠劫邊民官軍追捕輒遁去熙寧三年轉運使孫固等諭以禍福因進兵平蕩三族以其地賦民以賓化砦為隆化縣隸涪州建榮懿扶歡兩砦其外銅佛垠者隸渝州南川縣朝廷因補其土人王才進充巡檢委之控扼才進死部族無所統數出



盜邊命熊本討平之建為南平軍以渝州南川涪州隆  
化隸焉

姚州境有永昌蠻古永昌郡地唐咸亨五年叛詔梁積  
壽為姚州道行軍總管討之武后長壽中大首領董  
期內屬其西有撲子蠻望蠻及黑齒金齒銀齒繡面繡  
脚雕題穿鼻長髻棟鋒羣蠻種類多不可記

欽定續通志卷六百三十九

欽定四庫全書

欽定續通志卷六百四十

四夷傳

六

南詔

驃

迦羅汝提等

緬甸

西南溪峒諸蠻

南丹州蠻

撫水州蠻

西原蠻

廣源州蠻

黎峒

環州蠻

室利佛逝

名蔑

單單  
越羅

烏斯藏

南詔或曰鶴拓曰龍尾曰苴咩曰陽劍本哀牢夷後烏  
蠻別種也稱王為詔其先有六詔曰蒙儻詔越析詔浪  
穹詔遣暎詔施浪詔蒙舍詔兵埒不能相君諸葛亮討  
定之蒙舍稱南詔居永昌姚州間鐵橋之南東距爨東  
南屬交趾西摩伽陀西北與吐蕃接南女王西南驃北  
抵益州東北際黔巫都羊苴咩城別都曰善闡府其地  
祁鮮山之西多瘴地平草冬不枯自曲靖州至滇池人  
水耕食蠶以柘犬和祁鮮而西人不蠶剖波羅樹實狀

若絮紐縷而幅之昆明城諸井皆產鹽長川諸山往往有金麗水多金甦越睽西產善馬俗無貴賤皆耕不繇役王蒙氏父子以名相屬自舍龙以來始有譜次可考

舍龙生獨邏亦曰細奴邏

按舊唐書獨邏作迦獨廐以細奴邏為迦獨廐子未詳孰

是

唐高宗時遣使朝武后時細奴邏子邏盛炎入朝傳

子炎閭及弟盛邏皮生皮邏閭開元時授特進封臺登郡王詔賜皮羅閭名歸義時五詔徵歸義獨彊乃厚利啖劍南節度使王昱求合六詔為一制可歸義已并羣

蠻遂破吐蕃寢驕大又以破洱蠻功冊雲南王徙治大和城天寶七載歸義死閭羅鳳襲初炎閭未有子以閭羅鳳為嗣及生子還其宗而名承閭遂不改鮮於仲通領劍南節度使卞忿少方畧故事南詔嘗與妻子謁都督過雲南太守張虔陀私之多所求丐閭羅鳳不應虔陀詬斬之且陰表其罪由是反攻虔陀殺之取姚州及小夷州凡三十二明年仲通自將出戎徭州分二道進次曲靖閭羅鳳遣使謝罪辭不遜仲通怒囚使者進薄

白崖城大敗引還閭羅鳳遂北臣吐蕃吐蕃以為弟其  
俗為弟鍾故稱贊普鍾號東帝楊國忠以劍南節度當  
國乃調天下兵使侍御史李密討之密敗於大和城死  
者十八會安祿山反閭羅鳳因之取蕩州會同軍據清  
溪關以破越析梟於贈西而降尋傳驃諸國尋傳蠻者  
俗無絲纊跣履榛棘射豪猪生食之其西有裸蠻亦曰  
野蠻漫散山中大厯十四年閭羅鳳立其孫異牟尋以  
嗣異牟尋有智數善撫衆畧知書既立悉衆入寇與吐

蕃并進臨城聚詔發禁衛及幽州軍以援東川與山東  
兵合大敗之異牟尋懼徙苴咩城更受吐蕃封為日東  
王然頗苦其徵索貞元四年節度使韋臯遣諜遺書異  
牟尋吐蕃疑之因責其質子異牟尋愈怒後五年乃遣  
使詣成都願竭誠歸款天子臯護送使者京師德宗賜  
以詔書臯令其屬崔佐時至牟苴咩城宣天子意異牟  
尋使其子間勸與佐時盟點蒼山乃發兵攻吐蕃使者  
殺之刻金契以獻遣曹長隨佐時入朝異牟尋自將數

萬大破蕃於神川俘其五王遣弟奏羅棟清平官尹仇  
寬等入獻地圖方物請復號南詔賜賚有加拜仇寬左  
散騎常侍封高溪郡王明年夏六月冊異牟尋為南詔  
王使還復遣清平官尹輔首等來謝獻方物異牟尋攻  
吐蕃復取昆明城以寶鹽池又破施蠻順蠻並虜其王  
置白崖城因定磨些蠻隸昆山西蠻故地破茫蠻掠弄  
棟蠻漢裳蠻以寶雲南十五年異牟尋謀擊吐蕃吐蕃  
亦謀襲之異牟尋與臯相聞臯命將引弩士三千往助



又以別將率數萬人屯黎州及嵩州為犄角吐蕃守城將多降會大寒遂引去十七年春又破吐蕃於是康黑衣大食等兵及吐蕃大酋皆降又合鬼主破吐蕃於瀘西吐蕃君長乃欲悉師出西山劍山收嵩州以絕南詔臯上言京右諸屯宜明斥候蚤斂田邠隴焚萊以待之異牟尋謂其聲取嵩州實窺雲南請臯將督軍進苴咩時吐蕃兵三萬攻鹽州詔臯深鈔敵鄙分其勢俄聞破麟州臯督諸將分道出與南詔會於是回鶻太原邠寧

涇原軍獵其北劍南東川山南兵震其東鳳翔軍當其  
西而蜀南詔兵深入克城七焚堡百五十所斬首萬級  
獲鎧械十五萬圍昆明維州不能克乃班師是役也南  
詔攻其腹心俘獲最多遣中人獎慰異牟尋比年獻方  
物優禮之元和三年異牟尋死子尋閭勸舊書作  
苴蒙閭立改  
賜元和印章明年死子勸龍晟舊書作  
龍蒙威立十一年為弄  
棟節度王嵯巔所殺立其弟勸利長慶三年始賜印是  
歲死弟豐祐立

按唐書蒙氏父子以名相屬  
至豐祐篡中國不肯連父名

穆宗使京

兆少尹韋審規持節臨冊豐祐遣使入謝太和三年嵯  
巖悉衆掩邛戎嵩三州臨之入成都掠子女工技數萬  
引而南南詔自是工文織與中國埒明年上表請罪比  
年使者來朝開成會昌間再至宣宗崩使者告哀時豐  
祐亦死坦綽酋龍自立憲朝廷不弔卹以草具進使者  
而遣遂僭稱帝建元建極自號大禮國懿宗以其名近  
元宗嫌諱絕朝貢乃臨播州咸通元年攻安南武州明  
年攻邕管杜棕當國請遣使示恩信并詔驃信以名嫌

冊命未可舉必易名乃得封乃命左司郎中孟穆持節  
往會嵩州陷穆不行自是頻年入寇攻交州破安南陷  
犍為嘉州黎州圓邛州擊雅州進攻成都先是經畧使  
李琢蔡京等前後奏罷戍兵李師望又請析邛蜀嘉眉  
黎雅嵩七州為定邊軍建節度治邛州去成都才五舍  
嵩州去邛乃千里緩急不相副又殺其使楊苜慶等而  
竇滂盧耽等繼為帥皆非將才以故蜀罹害最酷訖懿  
宗世無寧歲十四年復寇蜀陷黎州遂攻雅州擊定邊

軍成都大震坦綽遣使者遺書節度使牛勣欲假道入朝請憇蜀王故殿叢還書責之坦綽至新津而還寇黠中會僖宗立遣金吾將軍韓重持節往使俄攻黎州刺史黃景復擊走之乾符元年劫畧巂雅間破黎州入邛崃闕掠成都詔高駢領西川節度使逐蠻至大度河斬酋長五十收邛崃闕復取黎州南詔遁還遣使詣駢結好而踵出兵寇邊駢斬其使宣言將百萬衆至龍尾城問罪先是天子數遣使至其境酋龍不拜駢以其俗尚

浮屠法遣浮屠景仙攝使往酋龍與其下迎謁且拜乃  
盟而還遣官質子入朝乞盟駢結吐蕃為間築戎州馬  
湖沐源川大度河三城列屯拒險料壯卒為平夷軍南  
詔氣奪酋龍恚發疽死偽諡景莊皇帝子法嗣改元貞  
明承智大同自號大封人法年少好畋獵國事頗決大  
臣乾符四年遣使詣邕州節度使辛儼請修好詔使答  
報未幾寇西川駢奏請與和親右諫議大夫柳韜等諫  
遂寢蠻使再入朝議和親而駢徙荆南持前請不置帝

久未決南詔襲安南陷之都護曾袞奔邕府戍兵潰會  
西川節度使陳敬瑄申和親議時盧攜輔政與豆盧瑑  
皆厚駢乃譎說帝以宗室女為安化長公主許婚法遣  
宰相趙隆眉楊奇混段義宗來迎高駢上言三人皆南詔  
心腹宜止而鳩之蠻可圖也帝從之隆眉等皆死中和  
元年復遣使來迎後二年又遣使來會黃巢平帝東還  
乃歸其使法死偽諡聖明文武皇帝子舜化立建元中  
興遣使款黎州修好昭宗不答後中國亂不復通先是

有時傍矣川羅識二族通號八詔時傍為閣羅鳳徙置  
白崖城後與矣川羅識謀詣神川都督求自立為詔為  
閣羅所殺矣川羅識奔神川都督送之羅些城此外五  
詔皆為南詔所滅唯千旁羅顛及矣川羅識子孫在吐  
蕃晉天福間南詔段思平自立號大理國宋乾德三年  
王全斌平蜀欲遂取滇進滇池圖太祖鑒唐之禍以玉  
斧畫大度河曰此外非吾有也由是不通中國熙寧九  
年大理國遣使入貢自後不常來亦不領於鴻臚政和



五年廣州觀察使黃璘奏南詔大理國欲求入貢七年遣使來貢詔以其王段和譽為光祿大夫檢校司空雲南節度使上柱國大理國王朝廷以為璘功已知桂州周種劾璘詐冒得罪自是大理復不通中國間一至黎州互市紹興三年十月廣西奏大理國求入貢及售馬詔却之元憲宗二年命世祖征大理破之以劉時中為宣撫使與段氏同安輯大理諸蠻悉平

驃古朱波地自號突羅朱闍婆國人曰徒里拙在永昌

南二千里東距真臘西接東天竺西南墮和羅南屬海  
北南詔地長三千里廣五千里東北袤長屬羊苴咩城  
凡屬國十八曰迦羅婆提曰摩禮烏特曰迦黎迦曰半  
地曰彌臣曰坤朗曰偈奴曰羅聿曰佛代曰渠論曰婆  
梨曰偈陀曰多歸曰摩曳餘即舍衛瞻婆闍婆也凡鎮  
城九部落二百九十八縣彌臣至坤朗又有小崑崙部  
俗與彌臣同又有大崑崙國川原大於彌臣縣崑崙小  
王所居半日行至磨地勃柵海行五月至佛代國有江

支流三百六十有川名思利毗離芮土多異香北有市  
諸國估舶所湊越海即閩婆也十五日行踰二大山一  
曰正迷一曰射觀有國俗與佛代同經多葺補邏川至  
閩婆八日行至婆賄伽盧國皆服屬於驃驃王姓因沒  
長名摩羅惹其相名摩訶思乃青甕為圓城有十二門  
四隅作浮圖其俗明天文喜佛法有百寺民七歲祝髮  
止寺至二十不達其法復為民唐時南詔兵彊與驃地  
接常羈制之貞元中驃至雍羌間南詔歸唐有內附心

異牟尋遣使詣劍南西川節度使韋臯請獻夷中歌曲  
且令驃國進樂人於是臯作南詔奉聖樂雍羌亦遣弟  
舒難陀獻其國樂上古八音皆以木漆代之用金為簧  
無匏音惟驃得古製其樂五譯而至德宗授舒難陀太  
僕卿遣還太和六年南詔掠其民三千徙之柘東

緬甸亦古朱波地與驃異種而同類宋寧宗時嘗進白  
象元世祖即位屢遣使招諭不降至元二十年詔宗王  
桑阿克達爾等徃征之破其江頭城以兵守其地遣使

持地圖奏上二十四年緬平成宗大德元年詔封的立  
普哇拿阿迪提牙為緬王賜銀印其子合八的為緬世  
子賜虎符以其奉表入朝也四年緬王為其弟阿散哥  
也等所殺其子窟麻刺哥撒八逃詣京師即封為王命  
將率師往討八月緬國阿散吉牙等赴闕自言殺主之  
罪乃罷兵

西南溪洞諸蠻皆盤瓠種唐季酋長皆自署刺史馬希  
範據湖南蠻徭保聚依山阻江殆十餘萬至周行逢時

數出寇邊宋太祖下荆湖思通其地有辰州徭秦再雄者武健多謀蠻黨服之召至闕下即擢為其州刺史再雄誓死報練士兵三千人選親校二十人分使諸蠻傳朝廷意各得降表以聞太祖大喜改辰州團練使其後溪錦獎珍懿叙晃富元費福古施各州蠻酋皆遣使入貢或來朝並以為其州刺史間亦擾邊初北江蠻酋最大者曰彭氏世有溪州溪有三曰上中下又有龍賜天賜忠順保靜感化永順及懿安遠新給富來寧南順高

等州總二十州皆置刺史而以下溪州刺史為連率十  
九州隸焉州將承襲下溪州刺史率羣酋議當立者具  
州名移辰州為保證申鈐轄司以聞乃賜敕告印符彭  
氏自允殊文勇儒猛相繼為下溪州刺史天聖三年儒  
猛攻殺知中彭州彭文綰五年儒猛死其子仕端襲明  
道初仕端子復命其弟仕義為刺史仕義子師寶景祐  
中知忠順州慶厯四年以罪絕其奉貢皇祐二年始以  
師寶知上溪州朝貢如故既而師寶妻為仕義取去至

和二年師賈舉族趨辰州告其父之惡知辰州宋守信等率兵討之仕義遁入他峒自是蠻獠寇邊吏不能制嘉祐二年仕義就降歲奉職貢然黠鷲數盜邊熙寧三年為其子師綵所弑其兄師晏攻殺之納誓表於朝乃命師晏襲州事五年復以馬皮白峒地來獻進為下溪州刺史章惇經制南北江湖北提點刑獄李平招納師晏所屬州峒蠻各以地歸版籍師晏遂降詔修築下溪州城并置砦於茶灘南岸城名會溪砦名黔安戍以兵



隸辰州出租賦如漢民遣師晏詣闕授禮賓副使京東  
州都監元祐三年知保順州彭儒武等各來進奉初熙  
寧中以章惇察訪湖北經制蠻事而南江舒氏北江彭  
氏梅山蘇氏誠州楊氏相繼納土初立城砦使北內地  
為王民北江彭氏已見前南江諸蠻自辰州達長沙邵  
陽各有溪峒曰叙曰峽曰中勝曰元舒氏居之曰獎曰  
錦曰懿曰晃田氏居之曰富曰鶴曰保順曰天賜曰古  
向氏居之舒氏則德郭德言君疆光銀田氏則處達漢

瓊漢希漢能漢權保金向氏則通漢光普行猛永豐永  
晤皆受朝命南江諸蠻十六州之地惟富峽叙僅有千  
戶餘不滿百熙寧六年富州向晤來歸順光銀光秀等  
亦降獨田氏有元猛者頗桀驁章惇進兵討之南江州  
峒悉平置沅州尋又置誠州元祐初廢誠州為渠陽軍  
時諸蠻復叛朝廷方務休息並免追討諸路所開道路  
剗置堡砦並廢五溪郡縣棄而不問崇寧後復議開邊  
於是安化上三州及思廣諸峒各願納土輸貢賦又令

廣西招納左右江四百五十餘峒宣和中悉廢所置初  
郡其餘諸蠻自乾興以來或叛或服其類不一慶厯三  
年桂陽監蠻徭內寇詔發兵擊之蠻徭居山谷間其山  
自衡州常寧縣屬桂陽郴連賀韶四州環千餘里不事  
賦役謂之徭人時蠻勢方熾降敕書委知潭州劉沆治  
諭沆發兵臨之以敕書從事降二千餘人錄其首領鄧  
文志黃文晟黃士元皆為三班奉職時四年冬也五年  
二月餘黨唐和等復內寇沆檄楊畋等八路入討覆其

巢穴然唐和等猶未平是冬蠻復入寇詔以劉夔代沆  
為安撫使大發兵討之其衆遁入郴州黃莽山由趙峒  
轉寇英韶州依山自保七年唐和遣其子執要領詣官  
自言願貸糧米居所保峒中詔補唐和等五人峒主並  
授階官至冬其衆悉降嘉祐二年羅城峒蠻寇澧州發  
兵擊走之三年以施州蠻向永勝所領州為安定州五  
年以邵州蠻楊光倩知徽州紹興四年歸明保靜南渭  
永順三州彭儒武等遣人持表及方物赴行在九年宜

章峒民駱科作亂寇郴道連桂陽諸州縣詔發兵討之  
獲駱科餘黨據藍山寇平陽縣江西兵馬都監程師回  
討平之十年承信郎琴州溪峒楊進顯等率族歸疆土  
來獻後屢入貢十二年詔以施州南砦路夷人向再健  
襲父思遷知懿州事乾道元年宜章峒賊李全臨郴州  
焚桂陽軍世忠峒李昂霄率壯丁禦賊民恃以安湖南  
提舉常平鄭丙討平之昂霄以功補承節郎管轄衡州  
常寧縣溪峒三年靖州界徭人姚明教等作亂詔荆鄂

駐劄明椿會屯戍兵合擊之四年田彥古死子忠佐襲  
知溪峒安化州六年廬陽西據獠楊添朝寇邊詔知沅  
州葉行招降之嘉定元年郴州黑風峒徭人羅世傳寇  
邊知隆興趙希擇知潭州史彌堅共招降之二年李元  
礪羅孟二寇江西攻破龍泉縣命工部侍郎王居安知  
豫章擒獲之溪峒畧平

南丹州蠻亦溪峒別種與宜州及西南夷接壤宋開寶  
七年酋帥莫洪謦遣使奉表求內附後屢來貢雍熙四

年洪瞽族人知寶隆鎮莫淮誘羣蠻為寇詔發諸州兵進討兵未至悉遁歸淳化元年洪瞽卒弟洪皓襲稱刺史遣其子淮通來貢景德三年洪皓死長子淮勅襲父任俄為弟淮迪所攻帥屬來奔詔宜州賜閒田資給之景祐三年有淮戟者舉族來歸命為湖南州團練副使後淮迪老自言願傳其子世漸至和元年命世漸權發遣州事世漸死嘉祐末命其子公帳襲之淮迪子世忍攻殺公帳奪其弟自首請於朝治平三年遂命為刺史

熙寧二年，徭賊殺人，世忍執以獻，授檢校禮部尚書。元豐三年，入貢。六年，遷檢校戶部尚書。世忍死，子公佖襲。大觀元年，廣西經畧使王祖道言：公佖就擒，以其地為觀州。延德軍紹興三年，公佖弟公晟攻圍觀州，用劉彥適言，以公晟知南丹州。兼溪峒都巡檢使，提舉盜賊公事。二十四年，公晟始入貢，率諸蠻來歸，以延沈襲。公晟職使持節南丹州諸軍事，南丹州刺史。二十五年，延沈進補團練防禦二使。三十二年，為諸蠻所逐，歸死省地。



衆推延廩襲職隆興二年延廩復為諸蠻所圖攜家歸  
朝經畧司奏以延甚襲職淳熙元年為永樂州所攻廣  
西帥臣遣將領諭和之十四年經畧司奏以延廩襲職  
嘉泰五年延廩子光熙襲職知南丹州事

撫水州在宜州南有縣四曰撫水京水多逢古勞唐隸  
黔南其酋皆蒙姓有上中下三房及北遐一鎮宋雍熙  
中數寇邊詔書招安補其酋蒙令地殿直蒙令札奉職  
咸平中又數為寇止令邊臣驅逐出境其黨狡猾者凡

三十餘人宜州守將擒送闕下詔釋其罪勗遣之逾年  
酋長蒙頂等詣闕累遣使來貢大中祥符六年首領指  
揮使蒙但孛族來歸徙桂州九年寇宜融州界命曹克  
明為宜融等州都巡檢擊破之焚其廬室積聚竄入山  
谷乃曉諭恩信許以改過酋帥蒙承貴州詣軍自首聞  
詔旨赦皆感悅軟血誓詔以撫水州為安化州撫水縣  
為歸仁縣京水縣為長寧縣自是間歲朝貢寶元元年  
復寇融宜州發邵澧潭三州戍兵往擊踰年乃平慶厯

中再入貢至和二年復至詔以知州蒙全會為三班奉職又以監州姚全料為借職嘉祐六年又貢熙寧初土人羅世念等為亂五年攻德謹砦襲將官費萬殺之詔發在京驍騎及江南福建兵以聽師期明年世念等與諸蠻峒首領降以世念為內殿承制崇寧二年其酋蒙光有復為寇經畧司遣將擊卻之大觀二年遂以三州一鎮來上至和後又有融州屬蠻大邱峒首領楊光朝內附又有楊克端等來歸皆納之紹興三年安化蠻蒙

全劍等劫普議砦廣西帥臣遣縣砦將佐討平之四年  
廣南東西路宣諭明橐請廢平觀二州從之乾道六年  
詔補蒙澤進武副尉以其父蒙明為宜州蠻莫才都所  
害也淳熙十年冬安化蠻突入內地為亂十一年安化  
蠻蒙光漸率衆抄掠廣西路鈐轄沙世堅討平之十二  
年詔以楊世後襲父進通職補承信郎慶元四年宜州  
蠻蒙峒袁康等寇內地敕官鹽為亂廣西帥司調官兵  
招降之

西原蠻居廣容之南邕桂之西有甯氏者相承為豪又有黃氏居黃橙洞其隸也其地西接南詔唐天寶初黃氏疆與韋氏周氏儂氏相脣齒為寇害據十餘州韋氏周氏耻下黃氏攻之逐於海濱至德初首領黃乾曜真崇鬱與陸州武陽朱蘭洞蠻皆叛推武承斐韋敬簡為帥僭號中越王乾元初遣中使慰曉諸首領賜詔書赦其罪約降於是西原環古等州首領五百餘人請出兵討承斐等斬黃乾曜真崇鬱等七人承斐等以餘衆降

盡釋之其種落張侯夏永興夷獠梁崇牽覃問及西原  
酋長吳功曹復合兵內寇陷道州桂管經畧使邢濟擊  
平之執吳功曹等餘衆復圍道州進攻永州陷邵州湖  
南團練使辛京杲貪暴武岡戍將王國良叛建中元年  
城淑州以斷西原國良乃降貞元十年黃洞首領黃少  
卿攻邕管陷欽橫潯貴四州少卿子昌沔趨勇前後陷  
十三州詔唐州刺史陽旻為容管招討經畧使皆破之  
侵地悉復元和初邕州擒其別帥黃承慶明年少卿等

歸款拜歸順州刺史弟少高為有州刺史未幾復叛又有黃少度黃昌驩二部陷賓蠻二州據之十一年攻欽橫二州邕管經畧使韋悅破走之取賓蠻二州是歲復屠巖州自是邕容兩道殺傷疾疫死者十八穆宗時黃賊更攻邕州陷左江鎮攻欽州陷千金鎮邕州刺史崔結擊破之明年又寇欽州是歲黃昌瓘遣其黨陳少奇等請降敬宗納之太和中經畧使董昌齡遣子蘭討平峒穴夷其種黨諸蠻畏服十八州歲輸貢賦其後儂洞

最疆結南詔為助懿宗與南詔約和二洞數構敗之邕  
管節度使辛讜以從事徐雲虔使南詔結和齎美貨啖  
二洞首領僅得罷兵

廣源州蠻在邕州西南鬱江之源地峭絕深阻其先韋  
氏黃氏周氏儂氏為首領互相劫掠唐邕管經畧使徐  
申厚撫之黃氏納質而十三部二十九州之蠻皆定自  
交趾據有安南而廣源雖號邕管羈縻州實服役交趾  
宋時有儂全福者知儂猶州為交趾所執其妻阿儂嫁



商人生子智高智高殺其父因冒儂姓與其母據儂猶  
州建國號大歷交趾攻拔儂猶州執智高釋其罪使知  
廣源州又以雷火頻婆四洞及四浪州附益之居四年  
內怨交趾襲據安德州僭稱南天國皇祐元年寇邕州  
明年交趾討之不克遂求內屬廷議拒之智高既不得  
請又與交趾為仇且擅山澤之利招納亡命謀入寇四  
年四月攻破橫山砦遂破邕州僭號仁惠皇帝破橫貴  
襲潯藤梧封康端九州進圍廣州五十七日解去又攻

賀州不克九月破昭州十月破賓州復據邕州十二月  
敗陳曙於金城驛仁宗命狄青為宣撫使五年正月討  
敗之智高趨邕州夜焚城遁智高母阿儂收殘衆復欲  
入寇至和初余靖督部吏掩襲之獲阿儂及智高弟智  
光子繼宗繼封檻至京師悉棄市儂氏又有宗旦者知  
雷火洞嘉祐二年嘗入寇知桂州蕭固招之內屬以為  
忠武將軍七年以宗旦知順安州治平中宗旦與交趾  
李日尊劉紀有隙畏偪知桂州陸詵因使人說之棄其

州內徙命為右千牛衛將軍又有甲峒蠻者役屬交趾  
間出寇邕州景祐三年嘗掠思陵州嘉祐五年合交趾  
門州等蠻復為寇詔知桂州蕭固等追討又詔安撫使  
余靖擊之蘇茂州蠻亦近邕州至和嘉祐中皆嘗擾邊  
黎峒唐故瓊管之地在大海南距雷州泛海一日而至  
其地有黎母山俗呼山嶺為黎居其間者號黎人儋崖  
萬安皆與黎為境其服屬州縣者為熟黎居山峒者為  
生黎時出與郡人互市宋至和初有黎人符護者嘗犯

遷執瓊崖州巡檢慕容允則後以軍士五十六人與允則來歸允則道死詔貸軍士罪乾道六年黎人王用休為亂權萬安軍事同主管本路巡檢孫滋等招降之九年八月樂昌縣黎賊為亂黎人王日存等招降之以功借補承節郎淳熙元年詔日存子孫許襲職四年冬萬安軍王利學寇省地八年六月詔三十六峒都統領王氏女襲封宜人初王氏居化外累世立功邊陲皆受封爵紹興間瓊山民許益為亂王母黃撫諭諸峒無敢從

亂者以功封宜人至是以其女襲封十二年樂會縣白沙峒黎人王邦佐等為寇保義郎陳升之撫降之十六年詔以大寧砦黃弼補承信郎彈壓本界黎峒弼宜人黃姪也嘉定元年五月詔王氏女吳襲封統領三十六峒環州蠻區氏州隸宜州羈縻領思恩都毫二縣有區希範者思恩人也宋景祐五年與其叔正辭應募從官軍討安化州蠻自以有功不錄皆缺望尋遁歸率其族人推白崖山酋蒙趕為帝及荔波峒蠻為亂慶厯四年

正月破環州又破帶溪砦下鎮寧州及普義砦明年轉  
運使杜杞大引兵至環州擒之餘黨悉平鎮寧州亦隸  
宜州景祐三年蠻酋莫陵等內寇遣西京作坊使郭志  
高等往討未至陵等詣桂宜州巡檢李仲政請降是歲  
高竇州狄獠陳友朋等亦寇海上本路會兵擊之潰去  
室利佛逝一曰尸利佛誓過軍徒弄山二千里地東西  
千里南北四千里而遠有城十四以二國分總西曰郎  
婆露斯咸亨至開元間數遣使朝為邊吏侵掠有詔廣

州慰撫又獻侏儒僧祇女及歌舞官以其王為左威衛  
大將軍後遣子入獻詔封賓義王授右金吾衛大將軍  
遣還

名茂東接真陀桓西但遊南屬海北波刺有州三十以  
十二月為歲首王號斯多題龍朔初來貢單單在振州  
東南多羅磨之西亦有州縣乾封總章時獻方物羅越  
北距海五千里西南哥谷羅商賈往來所湊集俗與墮  
和羅鉢底同歲乘舶至廣州州必以聞

烏斯藏在雲南西徼外其地多僧無城郭羣居大土臺上不食肉娶妻無刑罰亦無兵革鮮疾病佛書甚多其土臺外僧有食肉娶妻者元世祖尊帕克斯巴為大寶法王既沒錫號大元帝師自是其徒嗣者咸稱帝師





欽定續通志卷六百四十